



Naaja H. Nathanielsen  
Inatsisartuni ilaasortaq, Inuit Ataqatigiit  
/- maani

### § 37 naapertorlugu apeqquummut akissut. 2013-042 Nukissiorfiit, Najn

07-05-2013  
Sags nr. 2013-082939  
Dok. nr. 1208285

Asasara Naaja

Postboks 909  
3900 Nuuk  
Tlf. (+299) 34 50 00  
Fax (+299) 34 54 10  
E-mail: iaan@nanoq.gl  
www.nanoq.gl

Aallarniutigalugu apeqqutigisat pillugu qutsavigiumavakkit, taamaalillunga suliap killiffia pillugu nassuiaanissamut periarfissinneqarama. Maannangaaq Naalakkersuisut sinnerlugit manna erseqqissaatigiumavara – Nukissiorfiit aktianik piginneqatigiiffimmut allangortinneqassagunik, tamanna imminermini nalinginnaasumik inuiaqatigiinnut, pingaartumillu atuisunut akitsuinermik kinguneqassanngilaq.

Nukissiorfiit innaallagissamik, imermik kiassarnermillu tunisassiorneranni inuiaqatigiit akornatsinni innuttaasut amerlanerpaat kallarneqartarput. Taamaattumik ingerlatseqatigiiffik allangortinneqassappat, innuttaasut ataasiakkaat kallarneqarneqartussaapput, aammalu inuussutissarsiornermik ingerlataqartunut sinaakkutissat sunniuteqarfingeqartussaallutik.

Tamanna aammalu suliap pingaaruteqarnera tunngavigalugu Nukissiorfiit aktianik piginneqatigiiffimmut allangortinneqarnissaannut periarfissat unammilligassallu pillugit naatsumik nalunaarusiortoqarnissaa Naalakkersuisut pilersaarutigaa. Tamatumunnga atatillugu allangortitsisoqassappat, tamatuma ammasumik, ersarissumik suleqataatitsiviusumillu, aammalu isummat soqutigisallu pingaarutillit tamarmik tusarneqarnissaannut qulakkeeriffiusumik ingerlanneqarnissaa Naalakkersuisunut pingaaruteqarpoq.

Piffissami aggersumi Nukissiorfiit ukiuni qulini kingullerni erngup nukinganut amerlasuunik aningaasaliisarsimanermi, nutaanut aningaasaliisarsimanermi aningaasaleeqqittarnermilu kingunerisaanik aningaasaqarnerminnik patajaallisaasussaallutik annertuunik unammilligassaqarput. Tamatuma saniatigut taperseeqatigiissitsisarnerit aammalu Nunap Karsianiit ingerlatsinermit tapiissutit ikilisikkiartuaartinneqarnissaat unammillerfiusussaapput. Pissutsit tamakku pissutaallutik akeqartitseriaaseq atuuttoq misissoqqinneqartariaqarpoq, tamatumalu kingunerisaat akit tamarmiusut qaffanneqassapput. Tamatumani Nukissiorfiit suliffeqarfittut imminut ingerlattutut ingerlaannarnissaa imaluunniit aktianik piginneqatigiiffingortinneqarnissaa apeqqutaassanngilaq.

Nukissiorfiit aktianik piginneqatigiiffittut allangortinneqaraluarpataluunniit, suli nukissiuuteqarnermut politikki inatsisinullu akuersisarneq aqutugalugit

nukissiuuteqarnerup ineriartortitsinerup politikki akuerisaq naapertorlugu  
ingerlanissaa Inatsisartunit qulakkeerneqartartussavoq.

Inussiarnersumik inuulluaqqusillunga

Miiti Lynge